

Bet Nyied Cibngux Angqyangz

快乐的中 秋 节

Vahsug naeuz ndaej ndei “ronghndwen bet nyied cibngux ronghsagsag”, ronghndwen bet nyied cibngux rongh dangqmaz, luenz dangqmaz. Moix daengz aen ciet neix, daengx ranz gou couh doxcomz naengh, doq yawj ronghndwen, doq gwn bingronghndwen. Vuenvuen heijheij lwnh coenz sei roxnaeuz vahduenz mizgven ronghndwen.

“Ha, baenzneix baenzgwn, gou ngah baenz myaiz yaek rih bae.” Daegnuengx da dinghdingh yawj haeuxbyaek caeuq bingronghndwen baenz congz, faj fwngz ndeu gaeng

depgyawj aen hab bingronghndwen ndeu bae lo.

Gou riengjret baet deuz fwngz daegnuengx, naeuz: “Naemj gwn bingronghndwen couh aeu boih seiqeq, boih ndaej coenz sei mizgven ronghndwen ndeu, couh ndaej gwn aen bingronghndwen ndeu.” Neix dwg caezgya naeuz gvaq, mbouj ndaej mbouj guh ha.

Daegnuengx gaeu rwz nyauj gemj naeuz: “Ndae ndaej, gou boih, w……ronghndwen lumj bingronghndwen.”

Gou bulu riu hwnjdaeu: “Loeng, neix mbouj dwg seiqeq.”

Daxbuz riu naeuz: “Duzlingz lauz ronghndwen.”

Gou bibi gyauej naeuz: “Loeng. Neix dwg mingzcoh gojgaeq, mbouj dwg coenz seiqeq.”

Daxmeh ngauzngauz gyauej naeuz: “Ronghndwen cibngux cib-roek luenz.”

“Loeng. Neix dwg mingzcoh go.”

Seizneix, raen daxboh angqyangz naeuz: “Gwnz haij ronghndwen hwnj, lajmbwn caemh seizneix.” Sawqmwh, gou yawjraen daxboh gaem cek 《Saw Boih Seiqeq》 ndeu. Gou naeuz: “Daxboh dajlah. Neix mbouj suenq.”

Yaek daengz gou angj bonjsaeh lo: “Naj mbonq ronghndwen lwenq, ngeiz dwg mwi gwnz dieg.” “Lij iq mbouj rox ndwen, heuhguh buenznyawhau.” “Ronghndwen seizlawz ok, ndoet laeuj cam aenmbwn.”

Ha——Caezgya dopfwngz haenh huhu.

Gou gwn aen bingronghndwen ndeu le. Yawj yiengh gyoengqde myaiz yaek rih, couh fat hawj boux aen. Dauqdaej dwg guh gvaqyinx ma.

Daxbuz haenh gou dwg boux hagseng iq miz dungxcaiz.

Youq mwh caezgya riuhaaha, ranz dou gvaq mbat bet nyied cibngux gyaundeide ndeu.

(Haj nienzgaep Cinz Lungz)

Vameizgveiq Caeuq Golinxvaiz

玫瑰和仙人掌

Gaxgonq, boux vunzguhndu ndeu ciengx miz bat golinxvaiz cocatcat caeuq bat vameizgveiq gyaueulili, song bat neix ngaiz cuengq youq ndijgaen.

Vameizgveiq raen saetnaj lai, gag naemj: “Gou baenzneix gyaue, baenzlawz ndaej caeuq golinxvaiz guh ranznden ne?”

Yienghneix, vameizgveiq ngoenzngoenz ndaq golinxvaiz.

Miz ngoenz ndeu, doek fwnraq, golinxvaiz yaek deng rwed dai lo, vameizgveiq cix youq ndaw fwn diuqfoux angqvauvau ne, doq diuq doq naeuz: “Golinxvaiz neix, di fwn neix mwngz couh dingj mbouj ndaej lo, yaez lai.”

Golinxvaiz daejnga'nga naeuz: “Dwg lo, dahcej vameizgveiq, gouz dahcej coih nuengx dangj mbat ndeu ba.”

“Byawz aeu coih mwngz ha?” Vameizgveiq ndaengndiengq ndindi.

Golinxvaiz naemj mbouj doeng cam naeuz: “Hozbit aeu cungj vah neix ma gangj ne? Vihmaz raeuz mbouj ndaej doxhuz caemhyouq ne?”

Vameizgveiq yiemz golinxvaiz lai: “Bouxlawz aeu caeuq mwngz doxhuz caemhyouq, caeuq mwngz guh ranznden hoj youq lai.”

“Hoeng, raeuz ciuh neix cungj dwg aeu daeuj hawj vunz yawj, caiq naeuz……”

“Haep bak mwngz gonq!” Vameiz-

gveiq hozgaek liux, “Mwngz couh deq youq gonq, mbouj yungh geijlai ngoenz mwngz rox deng rwed dai bae!”

Gvaq geij ngoenz, golinxvaiz caengz dai. Daengngoenz ngoenz haenq gvaq ngoenz, ngoenz ndat gvaq ngoenz, vameizgveiq yaek deng dak roz liux.

Raen vameizgveiq yaek deng dak roz, golinxvaiz vaiqdi aeu raemx ndaw ndang de hawj vameizgveiq.

Vameizgveiq raen sim raeuj lai, couh cam: “Baez gonq gou cix mbouj coih mwngz, baez neix guh maz coih gou ne?”

“Raen bouxde miz gunnanz, dou cungj rox bae doxcoih, sim golinxvaiz couh dwg yienghneix” Golinxvaiz naeuz, “Moix boux vunz cungj miz giz ndei de caeuq giz mbouj ndei de, raeuz aeu gaj giz mbouj ndei bae, aeu yawjraen giz ndei bouxde.”

Vameizgveiq dingq le, cungj najmong liux, gag ngaem gyauej roengz.

(Gangjbwz Gih Gveicwngz Gaihdau Cunghsinh Siujyoz sam nienzgaep (1) ban Couh Meijdungz raiz Yangz Yenlinz hoiz)



Vat Byaekcwx

挖野菜

Cin raeuj va hai, doenghgo didnyez, aen geiqciet neix dwg mwh byaekcwx ceiq oiq. Ngoenz singhgiz, gou caeuq daxmeh dawz fagcanj caeuq aendaeh caepcawq youq ndaw suen vat byaekcwx.

Go byaekcwx dou vat heuhguh golinzgaeq, de maj ndaej ak raixcaix, dingzlai maj youq dieg ndit cuk, caemhcaiq ra raen go le, couh youq henzgyawj raen miz haujlai go. Golinzgaeq aen geiqciet neix ndoj youq ndaw nywjhawq, hoj ra raeuh, aeu gungz hwet roengz gyawj najdieg, sijsaeq yawj. Danghnaeuz bungz go miz ngazgawq caemhcaiq dep youq najdieg, haenx couh dwg golinzgaeq lo! Ngamq haindu, gou gip lai, ra raen golinzgaeq le, mbouj vat laeg di, mbouj siujsim couh vat gat daengx golinzgaeq lo. Gvaqlaeng, gou rox, aeu vat lai laeg di, baujlouz gaiq rag golinzgaeq caezcingi. Riengzlaeng, caiq yaeng' yaeng saeuj namh bae, gou siujsim lili mbaet nywjhawq roengzdaeu, doeklaeng aeu golinzgaeq cuengq roengz daeh bae.

Mwh vat byaekcwx, gou gip ndaej aen dienhvah soujbiuj ndeu, cam vunz bae vunz, gou dauqdaej ra raen bouxcawj lo, aeu aen dienhvah soujbiuj hawj de dauq.

Ngoenzneix, dou sou ndaej lailai, vat ndaej baenz daeh golinzgaeq. Dingqnaeuz golinzgaeq yw binghnyouhdangz baenz, gou couh soengq daengx daeh golinzgaeq bae hawj daxdaiq lo, aenvih de baenz binghnyouhdangz. Daxdaiq angqyangz raixcaix, banhaemh, daxdaiq guh gyaeggaeq cien golinzgaeq hawj dou gwn. Caen dahraix, gaiq bonjfaenh guhhong ra ndaej cij dwg gaiq ceiq homvan.

(Ngeih nienzgaep Cwz Gvanlinz)